

Regio.
Nomina.
Situs.

Cæli temperies.
Soli fertilitas.
Imperium majorem.

Urbes.

Flumina.

Gracia sequitur Europæ nobilissima regio, totiusque eruditionis fons & Mater. Incolis *Hellas* dicebatur. Qui vero hodie eam habitant eam *Romechi*, Turci *Horomeli* nominant. *Rumelia* est Leunclavio: Septuaginta Interpretibus *Phobel*, & *Javan*. *Graciam* autem non semper omnes iisdem terminis circumscribunt. Proprie ab Isthmo Thessaliam usque extenditur, & ab Epiro Amne Acheloo dispescitur: Ortum versus habet Mare *Ægæum*: atque hæc proprie est *Hellas*. Hoc est quod Plinius aliquoties innuit; *Ab Isthmi*, inquit, *angustius Hellas incipit*. Et rursus: *Angusta cervice Peloponnesum contingit Hellas*. Interdum etiam Peloponnesus & Thessalia Græciæ notione comprehenduntur. Ita L. Æmilius Paulus quum circuiret Græciam, per Thessaliam Delphos petiit, inde Lebadium, tum Chalcidem, postea Aulidem, inde Athenas; altero die Corinthum, tum Sicyonem, Argos, Epidaurum, Lacedæmonem, Megalopolim, Olympiam: Ita peragrata Græcia rediit Amphipolim. Homerus solos *Phiotas* vocat *Hellenas*. Herodotus inter *Hellenas* & *Pelasgos* discrimen facit. Hodie vero Græciam vocamus tractum omnem qui ad Occidentem Ionio mari adluitur, ad Meridiem Libyco, ad Ortum *Ægæo*: ad Septentrionem vero montibus a Thracia, Mysia, Dalmatiaque separatur. Regio hæc præstabat olim reliquis Europæ Cæli temperie, ac benignitate: Frugum omnium fertilitate, Armentorumque omnis generis copia. Hæc illa est regio, quæ fama, quæ gloria, quæ doctrina, quæ plurimis artibus, quæ etiam imperio & bellica laude diu floruit. Libera primum, sed dum imperium in socios affectat, serva. Itaque eam primum *Cyrus*, postea *Xerxes* aliique *Persarum Reges* vexaverunt. Subjecere eam sibi inde *Macedones*: tum *Perseo* devicto *Romani*: quorum imperio diviso celsit tota *Constantinopolitana*, donec *Gothi Bulgari*, *Saraceni* eam deprædati sunt, & *Turca* postremum in miseram servitutem omnem redegit, exceptis quibusdam Insulis quæ *Veneto* parent, *Corcyta* scilicet, *Cephalenia*, *Zacyntho*, *Creta*, aliisque minoribus, Superbivit olim Græcia multis urbibus florentissimis: *Athenis*, *Lacedæmone*, *Delphis*, *Argis*, *Mycenis*, *Corintho* aliisque plurimis, quarum pleræque, ut caduca & fluxa est mortalium rerum conditio atque interitui obnoxia, prostrata & diruta jacent. Flumina hic & fama & natura ingentia xxxii numero: Ea sunt *Strymon*, *Chabrus*, *Echedorus*, *Axius*, *Erigon*, *Lydius*, *Aliaemon*, *Pharybus*, *Peneus*, *Sperchius*, *Paryassus*, *Apsus*, *Lous*, *Celidnus*, *Thyamus*, *Acheron*, *Arachthus*, *Achelous*, *Evenus*, *Ilissus*, *Asopus*, *Ismenus*, *Cephissus*, *Boagrus*, *Asopus* alter, *Sus*, *Peneus*, *Alpheius*, *Selas*, *Parysius*, *Eurotas*, *Inachus*. *Maria*, *Ionium*: nomen habet ab *Ionia*, quam regiunculam in ultimis Italiæ oris facit Solinus: vel ab *Ionio* Illyriorum Rege: vel ab *Ionibus*, ut censet Archidamus, ab *Creta*: Hodie *Mar di Candia*. *Carpathium*: ab Insula *Carpatho*, quæ ad Orientale *Cretæ* Promontorium. *Ægæum* dictum, ut Festus & alii scribunt ab *Ægæo* Thesei patre, qui in id se præcipitasse perhibetur: ut *Phe- recydes*,